



Vuê, tant che o lavi in glesie, sul zirâ di un cjanton, une femine che e coreve a mi é colade intôr. Par parâmi o ai mitût lis mans devant di me e cussí no je colade. Jê e si é scusade e jo i ai dite che se dutis lis feminis come jê a s'inçopedassin cussí ben devant di me o lis spieterès li tal stès cjanton ogni dì. Jê mi à graciât cuntune bocje da ridi e si é tolete vie.

Ma il ricuart di chel dí, di chel cjanton, di chê mule che a mi jere colade intôr e des sôs tetis palpadis pe prime vólte a l'etât di dodis agns mi son tornâts tal cjâf.

Folc e ti trai, in chê vólte o jeri talmentri impaçât che a mi jeri alçât e o jeri scjampât vie cence un dominus vobiscum.

In chê volte, se o viodevi rivâ une mule di front di me, o straviorsavi la strade par lâ su chel altri marcjepît.

Invezit plui tart, plui sigûr, se o jeri di chê altre bande, o straviorsavi par vignî a cjalâle di cheste, a nulîle di chê, a...

Insome, in chê dí, la Eve dal Nonçul a passave cuntune cassele di pomis e o mi jeri fermât par disi ce bielis pomis che veve e, cuant che mi veve invidât a cjolint une, o i vevi cjapât une tete.

Oh, juste une tetute piçule piçule. Ce podevie sei a 16 agns? Po mi jeri scusât e jê mi veve dât il perdon cuntune ridade e une pome.

Daspó, cul timp che al passe, il cjâf si met a puest e dome cualchi sium bagnât mi svee chei ricuarts che il sant cjanton di vuê al mi risvee.

Ce fâ da doman?

Mi metaraio tai cjantons par fâ fente di colâ? Tant che a si sa cemût jevâsi su. A si puès simpri tentâ, no? Senó, cemût fâ par scusâsi?

Cui, miôr che il signôr, nol saial che a si pree e implore miôr perdon dopo vê pecjât?

O puedarès preâ di bant pai pecjâts che o no ai mai fat, ma alore o fasarès pecjât di vanitât, di supierbie.

E po, ce dal ostie di sacraments dal tantum ergo di pecjâts saressino?

A san ducj che chescj pecjâts a no san di nuie e che lis preieris detis parsôre a saressin masse flapis sot.

Alore, tant al vâl pêcchiâ par dabon. A si pree miôr!

Spietant il prossin ego te assolvo Miserere mei, Deus secundum magnam misericordiam tuam...

E che non cj'induca in tentazione.

Amen.

di Jaio Furlanâr

#73